

#special

Un caya na Den Haag lo haya number di Laura Wernet-Paskel


Skirbi pa: Elias Aarab

Mi number ta Elias Aarab, mi a nace y crece na Den Haag, Hulanda. Mi mama Mariana Cecilia Werleman a hiba mi Aruba na un edad trempan pa conoce mi famia y establece un conexion cu Aruba. Mientrastanto, mi a cuminsa studia y mi a duna les durante mas o menos 12 aña.

Mi interes pa Aruba no tabata solamente pa e beachnan bunita y funchi hasa, sino principalmente pa historia de Aruba y pa mi antecedenenan.

Den mi investigacion, mi a descubri cu mi welo, Francesco Selecio Maduro, ta un di e personanan cu a duna su firma pa solicita pa Status Aparte. Pa algun persona esey ta bisa poco, pero pa mi esey ta bisa hopi, cu e Arubiano a realiza hopi lihe ken e tabata y den ki direccion e kier a nabega.

Den epoca sin internet y e luho cu nos conoce awendia, e cabayeronan aki a ser moldea pa e condicionnan duro di



Laura Wernet-Paskel

pasado. Sa bisa tambe cu tempo dificil, ta crea homber fuerte y tempo facil ta forma homber debil. Y esaki ta berdad sigur si nos fiha den historia di e personanan cu tabata responsabel pa desaroyo di Aruba.

Bibando na Hulanda bo ta wak hopi number di hende cu ta ser honra den caya, plasa y hopi otro luga. Bo por wak esaki tur parti cu un pida di e historia di e persona. Bo por admira esaki solamente y, sinembargo, el a cuminsa na haci mi inkieto.

E rason tabata simpel: Mi tabata y ainda mi ta convenci cu tin hopi Arubiano cu merece di ta honra di e manera aki. Debi na esaki mi a haci mi propio lista di number di persona cu den mi opinion a nifica hopi pa Aruba. Mi a manda esaki pa varios gemeente cu e speranza cu nan lo acept'e y lo us'e den nan gemeentenan pa proyecto nobo.

Desafortunadamente, nan a rechasa mi frecuentemente cu tur tipo di argumento y rason, esaki no a stop mi. Mi a sigui manda e-mail y yama y splica nan pakico esaki ta importante y pakico e heroenan aki merece esaki.

Aña a pasa y mi a ricibi un mensahe di Den Haag cu nan tabata considerando un number. Esta, Laura Wernet-Paskel, e heroe di Aruba. E comite di number di caya ya a scoge su number pa un proyecto nobo na Den Haag y, por lo tanto, lo us'e den un futuro cercano.

Esaki ta e prome paso di reconocimiento di Hulanda pa Arubianonan cu tabata di importancia. Ademas, esaki a duna mi e motivacion pa acerca otro gemeente di Hulanda pa usa number di Aruba pa posibel caya. Tur Arubiano mester sa kennan ta nan heroenan, y mester sa con importante nan tabata. No mester lubida e personanan aki. En berdad un pueblo cu lubida su heroenan ta un pueblo perdi. Ademas, esaki mester ta un inspiracion pa nos. Profundisa bo mes den e bida di Laura Wernet-Paskel mi lo bisa. Arubiano no mester busca heroe grandi tur ora for di Aruba, hopi biaha nan ta banda di nos sin cu nos ta ripara esaki.

Di boso ruman cu ta stima boso, stima Aruba y cu ta reza tur dia pa boso.